

27 Maart

Hebreërs 11:1-7

(Teks: 11:1, 7)

Is geloof nie dalk roekeloosheid nie?

Iemand wat in die Here glo, tree dikwels lynreg teen die sogenaamde eise van die werklikhede op. Noag het byvoorbeeld destyds 'n reuse skip op droë grond begin gebou. Natuurlik sou mense hulle koppe skud en hom met agterdog aankyk!

Jesus het sy dissipels ook geleer om nie op menslike insig of op eie kragte staat te maak nie. Hy het gesê: *"Julle moet julle vyande liefhê; doen goed aan die mense deur wie julle gehaat word; seën die mense deur wie julle vervloek word; bid vir die mense deur wie julle sleg behandel word"* (Luk 6:27 en 28).

Hoe kry jy dit reg om so teen die stroom van die "normale lewenswyse" in op te tree? Hoe kry 'n mens dit reg om jou vyand lief te hê in plaas van om hom te haat? Hoe het Noag dit reg gekry om, teen alle logika in, die ark te bou?

Geloof is die antwoord!

Om te glo is om onder leiding van die Heilige Gees *"seker te wees van die dinge wat ons hoop en om oortuig te wees van die dinge wat ons nie sien nie."*

So is ons *seker* van ons verlossing in Christus. So is ons ook *oortuig* van ons plek in die ewige heerlikheid van die Vaderhuis.

Geloof is nie roekeloos nie, geloof laat jou met vaste vertrouwe op die Here optree.

Sing Psalm 84:6

Ds. D J. de Kock (Pietersburg-Suid)